

Bosna i Hercegovina
Federacija Bosne i Hercegovine
TUZLANSKI KANTON

KANTONALNI SUD U TUZLI

Broj: 003-0-Su-26-000 087

Datum, 30. januar 2026. godine

VISOKO SUDSKO I TUŽILAČKO VIJEĆE BOSNE I HERCEGOVINE
Odjel za pravosudnu analitiku i izvještavanje

PREDMET: ***Godišnji statistički izvještaj o poštivanju optimalnih i predvidivih rokova, dostavlja se;***

U skladu sa Članom 15. stav 1. Pravilnika o vremenskim okvirima za postupanje po predmetima u sudovima i tužilaštvima u Bosni i Hercegovini, (Službeni glasnik BiH broj 5/2013), a shodno Odluci o predvidivim rokovima Kantonalnog suda u Tuzli, dostavljamo Vam statistički izvještaj o poštivanju optimalnih i predvidivih rokova za 2025. godinu, koji je dana 30.01.2026. godine analiziran na Kolegiju predsjednika Kantonalnog suda u Tuzli.

- **Analiza pokazatelja iz statističkog izvještaja o poštivanju optimalnih i predvidivih rokova:**

Uvidom u Statistički izvještaj o poštivanju optimalnih i predvidivih rokova iz CMS-a, koji Vam dostavljamo u prilogu, konstatovano je sljedeće:

Prema pokazateljima iz navedenog Statističkog izvještaja iz CMS-a, proizilazi da je do prekoračenja predvidivih rokova u najvećoj mjeri došlo na drugostepenom krivičnom referatu, drugostepenom parničnom i privrednom referatu, drugostepenom referatu odlučivanja po žalbi u zemljišno – knjižnim predmetima, referatu odlučivanja o ponavljanju postupka u građanskim stvarima, drugostepenom i prvostepenom krivičnom referatu, ali to prekoračenje nije bilo u značajnom broju dana, osim na drugostepenom parničnom referatu, gdje su predmeti završeni sa prekoračenjem predvidivog roka od 603 dana.

U Kantonalnom sudu u Tuzli od 01.01.2025. godine na svim referatima bilo je ukupno ***neriješenih 2819 predmeta***. U izvještajnom periodu, primljeno je na svim referatima 3909 predmeta, tako da je

ukupno u radu bilo 6728 predmeta. Zbog odsustva sudija usljed bolovanja i odlaska troje sudija u penziju, nije bilo moguće smanjiti broj predmeta kako je sud planirao.

U 2025. godini na svim referatima **riješeno je 4785 predmeta** i od tog broja:

- u optimalnom roku, riješeno je **2403 predmeta**,
- u predvidivom roku riješeno je **3895 predmeta** i
- sa prekoračenjem predvidivog roka riješeno je **890 predmeta**.

Najveće prekoračenje optimalnog roka je u 1218 predmeta na drugostepenom parničnom referatu, a predvidivog roka je u 603 drugostepena parnična predmeta, 110 drugostepenih krivičnih predmeta, 57 drugostepenih predmeta odlučivanja po žalbi u zemljišno – knjižnim predmetima, 42 drugostepena privredna predmeta, 39 vanparničnih predmeta i neznatnog prekoračenja od jednog do petnaest dana u prvostepenim krivičnim predmetima i predmetima ponavljanja postupka u građanskim stvarima do 5 dana.

Prosječno trajanje riješenih predmeta iznosi 237 dana, dok je 2024 godine iznosilo 366 dana, a *prosječno trajanje neriješenih predmeta iznosi 252*, a prethodne godine je iznosilo 253 dana, što predstavlja značajno smanjenje prosječnog trajanja riješenih predmeta, u odnosu na prethodnu godinu.

Broj **neriješenih predmeta** na kraju izvještajnog perioda je **2123 predmeta**, što znači da se značajno smanjio broj neriješenih predmeta za **826 predmeta** u odnosu na početak izvještajne godine. Od ukupnog broja neriješenih predmeta, sa prekoračenjem optimalnog roka je 940 predmeta, sa prekoračenjem predvidivog roka 138 predmeta, dok je bez prekoračenja predvidivog roka 1805 predmeta. Najveće prekoračenje optimalnog roka u neriješenim predmetima je u 454 predmeta na drugostepenom krivičnom referatu, a predvidivog roka je u 98 predmeta, također, na drugostepenom krivičnom referatu.

Prekoračenje optimalnih i predvidivih rokova u riješenim i neriješenim predmetima, u najvećoj mjeri je došlo zbog čestog odsustva sudija usljed bolovanja i odlaska 3 (tri) suca u penziju, sredinom 2024. godine, kao i povremeno delegiranje sudije sa Krivičnog odjeljenja, kao ispomoć Kantonlnom sudu u Odžaku. Također, sudije su bile znatno opterećene predmetima na drugostepenom građanskom referatu u prosjeku sa oko 100 predmeta, što predstavlja normu od sedam mjeseci, bez priliva novih predmeta i objektivno se ne mogu ispoštovati optimalni i predvidivi rokovi, koji su u odnosu na prethodnu godinu značajno smanjeni. Također, na krivičnom drugostepenom referatu, dvoje sudija je zaduženo sa oko 300 predmeta, što predstavlja godišnju i po normu

predmeta, a sve zbog nepopunjenih sudijskih pozicija na krivičnom odjeljenju.

Problem optimalnih i predvidivih rokova ne bi bio toliko izražen da sudije rade samo zaostale neriješene predmete koji su određeni Odlukom o predvidivim rokovima sa danom 01. januar 2025. godine. Problem nastaje zbog toga što se predmeti rješavaju prema Planu rješavanja predmeta, te ukoliko je predmet sa starijim inicijalnim aktom i dostavljen je na rješavanje po žalbi u ovaj sud, uzima se odmah u rad. Stoga, u takvoj situaciji dolazi do nesklada između Plana rješavanja predmeta i Odluke o predvidivim rokovima, prema kojoj se predmeti trebaju uzimati u rad prema starosti inicijalnog akta, kojim je pokrenut postupak pred općinskim sudom i pred ovim sudom, jer se predmeti moraju rješavati po starosti inicijalnog akta, kojim je postupak pokrenut pred općinskim sudom i starosti inicijalnog kojim je postupak pokrenut pred Kantonalnim sudom u Tuzli.

- **Analiza raspoloživih resursa u sudu:**

Kantonalni sud u Tuzli osnovan je za područje Tuzlanskog kantona i pokriva područje 8 (osam) općinskih sudova. S obzirom na broj sudija i stručnih saradnika u općinskim sudovima i broj predmeta koji se dostavlja na rješavanje po žalbi u ovaj sud, objektivno nije moguće predmete rješavati u optimalnim i predvidivim rokovima, jer i općinski sudovi rješavaju najstarije predmete u kojima inicijalni akt potiče iz starijih godina i predmete sa inicijalnim aktom, koji je iz novijeg vremenskog perioda. Kao i u prethodnim godinama, postoji nesrazmjer između broja sudija ovog suda i broja sudija i stručnih saradnika u općinskim sudovima, tj. mnogo veći broj je nosilaca pravosudnih funkcija u općinskim sudovima u odnosu na Kantonalni sud u Tuzli. Sa 31.12.2025. godine u Kantonalnom sudu u Tuzli radilo je **26 sudija**, uključujući i predsjednicu suda, od ukupno 34 sistematizirane i budžetom odobrene sudijske pozicije. Trenutno je upražnjeno 7 sudijskih pozicija, za koje su sredstva osigurana budžetom za 2026. godinu, s tim da je Visoko sudsko i tužilačko vijeće Bosne i Hercegovine, raspisalo konkurs za 6 sudijskih pozicija, od čega su tri pozicije predviđene za krivični referat, koji je trenutno najnevažniji u pogledu poštivanja optimalnih i predvidivih rokova. Osim toga, troje sudija, koji ispunjavaju zakonske uslove za odlazak u penziju, su usmeno najavili mogućnost odlaska tokom ove godine.

Također, u 2025. godini u ovom sudu je izražen problem nedostatka administrativno – tehničkog osoblja, (daktilografa). Trenutno je upražnjeno 6 pozicija administrativno tehničkog osoblja, čije popunjavanje je u toku.

Programom rada suda za 2026. do 2028. godine je predviđeno nekoliko strateških ciljeva, od kojih se dva cilja odnose na smanjenje broja neriješenih predmeta i smanjenje dužine trajanja neriješenih predmeta na Krivičnom i Upravnom odjeljenju, što će u značajnoj mjeri unaprijediti rješavanje predmeta u optimalnim i predvidivim rokovima.

- **Analiza „perioda neaktivnosti” u predmetima:**

U Kantonalnom sudu u Tuzli u izvještajnom periodu egzistirali su Plan rješavanja predmeta na godišnjem i kvartalnom nivou. U godišnjem Planu rješavanja predmeta nalaze se prvostepeni krivični predmeti, vanparnični predmeti, (priznanje inostranih sudskih odluka) i predmeti upravnog spora. Svi ostali predmeti su raspoređeni u rad prema Planu rješavanja predmeta, koji se sačinjava na kvartalnom nivou, svaka tri mjeseca i prema tom Planu predmeti se dodjeljuju sudijama u rad prema starosti inicijalnog akta, kojim je pokrenut postupak pred općinskim sudom i prema starosti faze, kojom je pokrenut postupak pred ovim sudom. Predmeti u sudu su ravnomjerno raspoređeni na sve sudije, tako da su u pogledu ukupnog broja predmeta sudije ravnomjerno opterećene. U nekim prvostepenim krivičnim predmetima, zbog raspisanih potjernica protiv optuženih i osumnjičenih lica, predmeti su neaktivni i ne mogu se raditi, tako da su u CMS-u ti predmeti označeni kao nerješivi. Na drugostepenom krivičnom referatu, postoji opravdana neaktivnost rada na predmetima, jer sudije objektivno zbog velikog broja zaduženih predmeta i pritvorskih predmeta, a nedostataka 3 suca, ne mogu predmete uzeti u rad, jer 80% mjesečne norme isključivo rade stare predmete, a preostali dio norme od 20% pritvorske predmete, predmete nasilja u porodici, privremene mjere, kao i ostale predmete po zakonu hitne prirode. Tokom izvještajnog perioda nije uočena neaktivnost u predmetima koja je subjektivne prirode.

U narednom periodu sud će, u situacijama kada je predvidivi rok duži od optimalnog, kontinuirano poduzimati aktivnosti usmjerene ka skraćanju predvidivih rokova i to realizacijom utvrđenih strateških ciljeva suda.

- **Prijedlog mjera kako bi se utvrđeni predvidivi rokovi skraćivali i približavali optimalnim rokovima:**

1. Izvršiti što prije popunjavanje 6 (šest) upražnjenih sudijskih pozicija u Kantonalnom sudu u Tuzli, od kojih je za 3 (tri) pozicije konkurs raspisan od strane Visokog sudskog i tužilačkog vijeća Bosne i Hercegovine u augustu 2025. godine. Razlog hitnog popunjavanja upražnjenih pozicija je i zbog toga, što u penziju odlazi jedna sudija sa Krivičnog odjeljenja sredinom 2026. godine,

a 3 (tri) suca Građanskog odjeljenja su usmeno najavili odlazak u penziju, zbog ispunjenih zakonskih mogućnosti.

2. Od nadležnog Ministarstva pravosuđa i uprave Tuzlanskog kantona tražiti saglasnost za popunjavanje 4 (četiri) pozicije stručnih saradnika, koji bi bili u funkciji podrške u radu sudijama, posebno na krivičnom referatu, koje pozicije su sistematizirane u Pravilniku u unutrašnjoj organizaciji Kantonalnog suda u Tuzli.
3. Od nadležnog Ministarstva pravosuđa i uprave Tuzlanskog kantona tražiti saglasnost za popunjavanje 10 pozicija pripravnika - volontera, koji do sada nisu bili angažirani u ovom sudu, radi stručnog usavršavanja i pomoći u radu sudijama.
4. Potrebno je izvršiti hitno popunjavanje 6 (šest) upražnjenih pozicija administrativno – tehničkog osoblja, (daktilografa) koje je u funkciji podrške rada sudijama.
5. Neophodno je da Visoko sudsko i tužilačko vijeće Bosne i Hercegovine privremeno prestane sa dosadašnjom praksom privremenog upućivanja sudija Kantonalnog suda u Tuzli, kao ispomoć Kantonalnom sudu u Odžaku, dok se ne izvrši popunjavanje upražnjenih 6 sudijskih pozicija, jer u suprotnom to će dovesti do još lošijih rezultata rada suda, a u Federaciji Bosne i Hercegovine ima nekoliko kantonalnih sudova, koji su mnogo ažurniji i mogu dati značajnu pomoću u rješavanju predmeta u Kantonalnom sudu u Odžaku.

Predsjednik suda

Dr. sci. Muhamed Tulumović